



DEO OPTIMO MAX.  
UNI ET TRINO,

VIRGINI DEI-PARÆ, ET S. LUCÆ,  
Orthodoxorum Medicorum Patrono.

BIJ Sainte  
Médécine  
Paris

QUÆSTIO MEDICA\*,  
CARDINALITIIS DISPUTATIONIBUS  
*manè discutienda in Scholis Medicorum, die Jovis octavâ mensis  
Martii, anno Domini M. DCC. LXXXI.*

M. LUDOVICO-ALEXANDRO DE CEZAN, Doctore  
Medico, Præsîde.

*An sanis quotidianus ἐνϋματων simplicium usus ?*

I.

**S**I Medicus vitam ac sanitatem hominis arte suâ tueri & conservare vult ac debet, necesse est ut genuinas vitæ ac sanitatis causas, & quomodo hæc remediis sustineri debeant, & remedium quibus succurrere potest vires, perspectas habeat, refert Hoffmannus. Plenior interim causarum sanitatis cognitionem ad ætiologiam morborum evolvendam necessariò conferre, in confesum venit. Quot heterogeneæ malorum in his, tot homogeneæ bonorum in illâ compages. Hominem in statu perfecto sanum consideres. In cerebro vigent sensus, emicat

\* Auctore M. Francisco-Ludovico THOMAS D'ONCLÉE, anno 1757.



animi alacritas; uno verbo vegeta in obscundis muniis libertas, legitimæ chyliferos signa, mutum inter solida & fluida, animam & corpus consensum prædicat. Paucis verò diebus quæ mutatio! Dolent viscera, languescunt vires, obtunduntur innumeris modis simul vel seorsum omnium corporis organa; denique à rerum non naturalium abusu generale disturbatur commercium. Quis animo non sibi fingeret morborum ægritudinibus sanitatis dulcedinem redimi debere? Immodicâ quilibet ætatis etiam capacioris trahitur voluptate. Resistere nescius secuturum hinc arcere malum, & vitia bonis compensare sic tentat: vir ut opipara devoret alimenta, potu generoso imò & aquis cardiacis se proluat impunè; foemina sobria magis aliquando, gratam colore venerem tueatur, sæpius fugitivam revocet, absentemve mentiatur; ferè semper utrique iisdem illecebris allecti, enematis aquæ fluvialis tepidæ singulos in dies repetitis alium irrigant:

*Dum vitant stulti vitium, in contraria currunt. Horat.*

auream hanc regulam altâ mente reponant. *In omnibus moderatio, mediocritas.*

### I I.

**I**NTER relaxantia & diluentia non infimum tenent tocum aquæ tepidæ clysmata, hæc partium internarum balnea, ut ex generalibus ad specificam morborum curationem ægros rectè disponentibus medicamentis præstantissima, spectantur. Æstus viscerum, colicosque dolores leniunt, status dissipant, consistentiam humorum spissant & augent, nimiamve diluunt minuuntque. In omnibus ferè morbis simplicia hæc anteposenda compositis *επιπροσποτινά* judicant & frequenter adhibent dexterrimi clinici. Plurimis profunt, nocent paucissimis. Præclare quidem in pathologicis casibus.

Sanis familiare est semel tantum vel bis in die alvum deponere, fœces neque duriores neque fluidiores, sed inter densitatis extrema mediæ excernuntur: oportet enim sanorum sedis esse figuratas. Quibusdam fibrarum robore citatior est excretio; aliis fibrarum debilitate, tardior; robustissimis quidem majori succorum perspiratione fœces exsiccantur, & non nisi ægrè dijiçuntur. Homo fuit integræ valetudinis cui quintâ demùm septimanâ alvus evacuabatur \*. Fateor quidem ob peculiarem diathesim multos posse præcaveri morbos, si moderatè & tempestivè usurpentur enemata simplicia. Ut enim relaxantia generatim partibus suis flexilibus fibras molliores laxioresque efficiunt. Ad intestinorum laxitatem tendunt; glandulas horum canalesque excretorios relaxando, majorem liquoris intestinalis copiam provocant, & inde constipationi medentur. Ut diluentia, molecularum aquearum ope humores à se dimovent, & majorem his afferunt fluiditatem; solida humectant & relaxant; majorem aquosarum partium copiam sanguini largiendo, minores reddunt oscillationes. Ad illos effectus Medico supercilio attendas; ex quotidiano usu abusus jam elucefcit,

### I I I.

**C**ORPUS elastico motu gaudere dicimus quod ex filamentis duris & tensilibus conflatum, expansionis & constrictionis, elongationis & abbreviationis patiens, in pristinum statum sese restituit. Fibris igitur solidas partes construentibus hunc adscribere non dubitamus elaterem; quem autem ad secretiones & excretiones, vitæ & sanitatis præsidia, tuendas adeò necessarium docent celeberrimi Medici, ut si alteretur tantummodo, nimia debeat fieri vasorum dilatatio & fibrarum expansio. Ex quotidiano enematum usu quantum suæ contractilitatis deperdent intestinorum fibræ! Nam à se invicem dimotæ in partium suarum interstitiis moleculas aquosas faciliè admittunt, & tunc expanduntur

\* Stalpart-von  
der Wielobf.  
55, cent. I.



ultra horum capacitatem. Id si contigerit, excrementa in cæcum delata ægrè ascendunt, ingrediunturque coli initium. A nerveo-musculosis & robustis, quibus hujus initium componitur, membranis relaxatis vix pressa urgentur. Vigente tamen musculorum abdominalium & diaphragmatis actione, explicatis adhuc tunicæ nerveæ rugis, progredi queunt. Cylindricam canalos more insolito ampliati formam recipiunt. In rectum si fortè delapsa, sphincteres quidem premunt & relaxant; à musculis dilatabitur anus; sed certè nulla erit fœcum exclusio nisi ter quaterve repetantur aquæ fluviatilis tepidæ clysteres, qui frustatim has sejungere, & per particulas extrudere valeant. Quod quotidie observamus ex horum incrementis quibus adeò familiaris simplicium enematum usus. Imò necesse est ut succi intestinales non modò tubum lubricent, sed etiam intimè misceantur scybalis, & humiditatem quæ transpiratione, calore, seu cum chylo per venas lacteas profilit, restituant. Relaxatis autem extrà modum fibris, minor sanguinis quantitas ad glandulas deferretur; tunc nedum major liquoris intestinalis copia provocetur, minor fit secretio: est enim secretio ut velocitas sanguinis in omni parte, ut demonstravit *Bellinus*. Imminutis motu peristaltico & calore, oleum in omento ad bilis genesim multum inserviens, ineptum evadet; ac proinde bilis ut purgans & clyster naturalis spectata, ad ejectionem fœcum intestina sufficienter stimulare non amplius poterit. Denique adeò levis est in organorum laxitate constituentium partium cohesio, ut naturales vitæ functiones absolvi sit impossibile.

## I V.

**A** Fibrarum laxitate morbos chronicos, vel saltem maximam ad hos proclivitatem, oriri constat. Tonus, robur & elater fibrarum in sufficienti liquidi per nervos influxu consistere videtur. Quæ propositiones millenis auctoritatibus, experiètiæque quotidianâ, stabilitæ pro efficaci argumento debent haberi. Caveant ergò quibus nimis intenditur clysterum simplicium usus. Ut relaxantia & diluentia in partium internarum inflammationibus maximo cum successu præscribuntur. Resorptionem enim aquearum molecularum in vicinas partes possibilem demonstravit *Boerhaavius*\*, cum venarum plurium generum injecta canalium ora subeant. Ideò fibras viscerum humectari & debilitari posse ultrà modum confirmatur. Quòd si opiparo victu plenius indulgere solemne fuerit; arteriæ lymphaticæ, glandulæ, & omnia secretionis organa aliquatenus obstruentur, officioque suo non ultrà sufficient, ipsaque natura obruta fatiscet\*. Destructo intestinorum tono, ructus, flatus, & molesta dyspepsiæ erumpent symptomata. Cerebrum ob communicationem nervorum ventriculo intertextorum hæc mala sentiet. Fiat minor animi commotio? Inordinatus erit fluidi per nervos affluxus; hinc tyrannidem suam exercebant spasmi quos affectus in viris hypochondriacos, in foeminis hystericos, & in utrisque vapores appellat *Sydenhamus*. Hæc enim à spirituum atæxi inordinatoque motu, potius quàm ab humorum aliquo vitio produci asserit. Quo in casu nocere potius quàm prodesse simplicia enemata addit peritissimus author. Mulierem viginti quatuor annorum nuper aqua tepidæ fluviatilis clysmatibus assuetam quotidie manè, vaporibus obsessam vidi. Nullis cujusslibet generis animi pathematibus obnoxia, benè menstruata, viro non languido, tam sincerè quàm ardentè dilecto copulata erat. Quæ igitur affectionis causa potest suspicari? Plurimi hanc inviserant Practici; exercitium, equitationem, animi recreationem, & alià huic convenientia suaserant. Quod verò fuisset à Medico præscriptum, ut id rejiceret mulier, sat

\* Legit. quæ in prælect. Boerhaav. Acad. hanc resorptionem in venas mesentericas crassiorum intestinorum experimento demonstrasse D. Mery.

\* Cheyn. in morbis feb. laxæ.



habebat. A frequentiori simplicium enematum usu posse oriri aut saltem fore morbum mihi venit in mentem; ideam hanc cum marito communicavi; illa, non meo consilio, sed assiduis mariti precibus, cum crederet obsequi, ab hac consuetudine, sensim tamen, discessit. Aliquando post exoluere symptomata; in pristinam rediit sanitatem, quâ hodiè lætissima fruitur. Si consuetudinem hanc, non ut causam efficientem, saltem in foeminis quarum laxior textura fibrarum infirmitatem indigitat, auxiliatricem, & virtutis elasticæ defectui multum faventem agnoscat profecto Medicus. Quid etiam formidare non debent, qui singulo mane largissimis aquæ tepidæ hæustibus sese ingurgitant, cum, quod in unâ parte corporis, in omnibus quoquomodo destruat æquilibrium\*.

\* Arbuthn.  
Essai sur la  
nature & le  
choix des ali-  
mens ch. VI.  
prop. II.

## V.

**CORRUPTIO** igitur optimi pessima. Ex quâcumque diversâ licet diathesi majora vel minora exoriri debere incommoda jam ex antecessis patet: si enim calidâ adedò siccâque donetur ut tuendæ valetudinis causâ quotidianum enematum simplicium usu absolutè teneatur homo, sanum hunc immeritò dixeris. Quidam tamen non modò rectè sese habent istis assueti, sed etiam nestorianos attingunt annos; quid inde? Nonne quidam singulos in dies rebus non naturalibus impunè abutuntur? Esto adhuc quòd ab opio Turcæ, à spiritu vini Poloni, &c. non alterentur; addas etiam quòd nullum juxta necessitates beneficium recipiant. Non ideo conveniens nec tutum crebris ictibus alicujus rei consuetudinem facere, imò periculosum, præsertim in medicaminum usu, vel quia natura assuefacta ab ipsis non movetur, vel quia, si dimittatur, statim morbus ingruit. Consuetudinis igitur vis miranda quidem; sed vitanda. *Celsum* audias: *homo sanus nullis se debet obligare legibus, varium vitæ genus habere.* Numquid ingrati foret animi adventitiam acquirere naturam? Ut enim ipsa tot omnium specierum alimentis orbem ditavit, ad desiderium horum nostros accommodavit appetitus, & ad horum digestionem aptis nos instruxit organis, sic etiam compressivo motu diaphragmatis ope musculorumque abdominalium, peristaltico, quem lubricans in roris formam vicinarum partium, ipsarumque glandularum intestinalium humor multum faciliat, foras pellit excrementa. Demùm ipsam sequi naturam, medium inter alibilia & prophylactica studebit servare, & in neutro extremorum unquam sapiens peccabit.

*Ergò sanis nocet quotidianus enematum simplicium usus.*

Proponerat Parisiis PHILIPPPUS PETIT-RADEL, Parisinus,  
Doctor Medicus Remensis, necnon Saluberrimæ Facultatis Medicinæ Parisiensis  
Baccalaureus. A. R. S. H. 1781. AB OCTAVA AD MERIDIEM.



Typis QUILLAV, Universitatis & Facultatis Medicinæ Typographi. 1781.